

# Puspè midar l'anteriura uniun da scripturs?

Il comité dals Dis da litteratura duai er esser la suprastanza

■ (anr/vi) In nov num e midadas da statuts propona la suprastanza da l'Uniun per litteratura rumantscha (ULR) a ses commembers. La presidenta spera sin ina buna discussiun a la proxima radunanza generala a Cuira. Las ultimas radunanzas èn stadas visitadas mal. Strusch diesch persunas – inclus suprastanza – èn stadas preschent. En l'invit per la radunanza dals 14 da matg a Cuira scriva la presidenta *Chatrina Josty*: «Deplorablamain n'ha l'ULR ils ultims onns betg pli giugà ina gronda rolla sco uniun che raduna persunas che scrivan.» Ma ina occurrenza che funcziuna dapi ventg onns fitg bain sajan ils Dis da litteratura a Domat. Perquai propona la suprastanza da transformar l'ULR en ina «Uniun Dis da litteratura».

## Il comité furma la suprastanza

Ina tala midada n'haja en sasez betg grondas consequenzas. I saja en emprima lingua ina concentrasiun da las forzas, scriva Josty. La contabilitad dals dis da litteratura e da l'uniun vegnessan en l'avegnir fatgas da la medema persuna. Il comité d'organisaziun dals dis da litteratura furmass en il medem mument era la suprastanza da l'uniun.

Tar las finamiras da l'uniun dessi novs accents. La realisaziun dals dis da littera-



tura fiss en l'avegnir l'emprima finamira en ils statuts. Enfin uss èn ils dis da litteratura stads sin plaz trais. Las duas emprimas finamiras èn tenor ils statuts actuals: porscher lectorats ad auturs e sustegnair prelecziuns. Ina ulteriura finamira ch'è da preschent anc fixada en ils statuts – realisar ina chasa editura – ha l'ULR pli u main cuntanschè. La Chasa

editura rumantscha sa chatta da preschent en sia fasa da pilot.

## Midada gia l'emna proxima?

«Jau sper che bleras persunas vegnian a la radunanza generala», di Josty a l'anr. Pertge i saja impurtant da discutir ina tala midada. Sche tuts s'exprimian persuent vegnian ins gia a prender ils 14

da matg la decisiun. Uschiglio stoppian ins forse far ina radunanza extraordinaria a chaschun dals dis da litteratura.

*Silvana Derungs* è en il comité dals dis da litteratura, ma s'engascha er en la suprastanza da l'ULR. Er ella vesa blers avantatgs. Las radunanzas generalas pudess ins en l'avegnir salvar gist a chaschun dals dis da litteratura cura che

blers commembers sa chattan tuttina a Domat. «Quai fiss ina buna chaschun da vegnir ensemen.»

Er ils lectorats ed il sustegniment per prelecziuns na fissan betg periclitads entras la midada, fa attent Derungs. Pertge il sboz dals statuts preveda aposta che la radunanza annuala fixeschia mintg'onn ina summa che vegn reservada per lectorats e prelecziuns.

Era la «Litteratura» pudess vegnir edida vinavant, sincereschian Derungs e Josty. Tut tenor tgi che fiss pront da surpigliar la redacziun e tge impuls che vegnan dals commembers possian ins er en l'avegnir puspè edir ina «Litteratura».

## Ultima midada avant set onns

Gia avant set onns ha l'uniun fatg ina midada pli gronda. Enfin il 2004 aveva l'uniun num «Uniun per scripturas e scripturs rumantschs». Perquai che betg sulet scripturs eran commembers han ins adattà il num e las statutas. La finamira era stada d'avrir l'uniun er a persunas che s'interesschan en general per la litteratura rumantscha.

**La radunanza generala da l'ULR ha lieu ils 14 da matg a las 10.30 en la chasa da la Lia Rumantscha, via da la Plessur 47 a Cuira.**

**Enfin il 2004 aveva l'uniun num «Uniun per scripturas e scripturs rumantschs». Uss duai il comité dals Dis da litteratura er esser la suprastanza.** KEYSTONE